



9. august 2013

UKA 2013/67

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqquumiuppara:

**Akiitsunut aningaasaliinissamullu pilersaarutit naapertorlugit Tasiilami mittarfiliornissamut periarfissaqarsinnaaneranut atatillugu misissueqqaarnerit tullianillu businesscare aallarteqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissueqqaarnerit naammassineqareersimassapput ukiumi aningaasaliiffiusumi 2015-mi timmisartunut suluusalinnut mittarfiliornerup pilersaarusernera aallartinneqarsinnaaqqullugu.**

(Inatsisartunut ilaasortaq Andreas Uldum, Demokraatit)

### **Tungavilersuut**

Ilumoorpoq Tunumi angallattut amerlanerpaat Tasiilamut ingerlasarmata. Angallanneq pillugu Isumalioqatigiisitit nalilerpaat, Kulusummi timmisartunut suluusalinnut mittarfiup Tasiilamut nuunneratigut angallaviit taakku marluk akornanni angalanerit ukiumut 1.640-nik ikilineqarsinnaammata. Angallanneq pillugu isumalioqatigiisitit ilisimatitsissutigaat tamatuma assingingaa akunnerni 273-ni timmisartumik timmineq, qulimiguulimillit timmitilluni piffissaq atorneqartoq marloriaataasarpoq, piareersarnermi apuunermilu assigiinngitsunik piareersaatigineqartarmata. Tamatuma nammineq takutippaa, ingerlatsinermit aningaasarpasuit sipaarneqartussaasut – Angallanneq pillugu Isumalioqatigiisitit nalilerpaat, ukiumut aningaasartuutit 6,8 millioner koruuninik ikilineqarsinnaasut – iluaqutaasussarli takuneqarneq ajortoq tassaavoq avatangiisit iluaquserneqarnissaat, aallartarnerit ikilippata silaannaq CO<sub>2</sub>-mik minnermik mingutsinneqartussaammat.

Aamma isiginngitsuusaarneqassanngilaq ilumoormat Tasiilamut toqqaannartumik attaveqalerneq Tunumi takornariaqarnermut siuarsaasussaammat. Takornariartitsisartut namminersortut aamma Destination Eastgreenland piareersimapput annertuumik suliaqarnissaminnut inuiaqatigiinnut iluaqutaasussat Assartuineq pillugu isumalioqatigiisitit naatsorsuutaanut naleqqiullugu suli anneruleqqullugit.

Demokraatini paasilluarparput misissuilluartoqaaqqaartariaqarmat. Angallanneq pillugu Isumalioqatigiisitit aningaasatigut toqqaannartumik sunniutinik naatsorsuinerat sananeqarpoq ukioq 2015 aammaavittut aallaavigalugu. Tamanna pissutaavoq matumuuna siunnersuutikkut siunnersuutigingsigu piaarnerpaamik misissuinermit aallartitseqqullugit Naalakkersuisut peqquneqassasut. Misissueqqaarnerit naammassippata pissusissamisuussaaq Tasiilami timmisartunut suluusalinnut mittarfiliornerup aallartinneqarnissaa tamatumalu suliap



aallartinnissaa 2015-mut Aningaasanut Inatsisissaq suliarineqalerpat  
eqqarsaatigineqartariaqassaaq.

Demokraatini aamma isumaqarpugut pilersaarutip akiitsut aningaasaliinissallu pillugit  
pilersaarummi piumasaqaataasut naammassisariaqarai, taamaattumik businesscare pitsaasoq  
pisariaqarpoq pilersaarut pivisunngortivinneqassappat.

Kalaallit Nunaanni angallannerup iluani aningaasartuutit ataatsimut tamaasa isigalugit  
aningaasanut inatsisissani tulliuttuni misissueqqaarnernut amerlanerusunik  
aningaasaliisariaqartussaavugut. Demokraatini tamanna akuersaarlugu suleqataaffigissavarput.

**Pisortanut aningaasaqarnikkut allaffissornikkullu kingunissai.**

Misissueqqaarnerit aningaasartuuteqarfiussapput. Misissuinerit taakku akissaat  
nassaarineqassapput Ineqarnermut, Attaveqatigiinnermut Angallannernullu Pisortaqarfiup  
maannakkut missingersuutaasa iluanni.

**Namminersorlutik inuussutissarsiortunut aningaasaqarnikkut allaffissornikkullu  
kingunissai.**

Namminersorlutik inuussutissarsiortunut aningaasaqarnikkut allaffissornikkullu  
kinguneqassanngilaq.

**Innuttaasunut aningaasaqarnikkut allaffissornikkullu kingunissai.**

Innuttaasunut aningaasaqarnikkut allaffissornikkullu kinguneqassanngilaq.